

Apliki la principojn de arto aŭ scienco : *~i kiel kuracisto Z ; ~i iun arton Z, medicinon, la sportojn, esp-on ; kelkaj jam ~as tiun regulan sendadon ; instruita ~ulo Z. 2 Efektivigi, realigi : ~i la konsilojn de iu ; honesta homo ~as siajn opiniojn ; ~i sian religion, la virtojn, la toleron. ~ema = ~a 3 : Esperanto venkos nur per ~a monro al la ~ema mondo, ke ĝi estas jam nun utila.*

\* **Pramo.** Granda platboato por transporti homojn, bestojn aŭ veturilojn de unu bordo de rivero al alia.

**pranci** (ntr). Ribele starigi sin sur postaj piedoj pp ĉevalo.

\* **Prava.** 1 Havanta opinion aŭ konduton konforman al vero k justo : *ne tiu, kiu plej laŭte krias, estas ~a Z ; li estas ~a en sia proceso Z ; kolero ~econ ne donas Z ; ~ulo Z. 2 Konforma al vero k justo, pp opinio : li senkulpigis sin per la plej ~aj motivoj ; nek la antikveco nek la disvastiĝo de ia ajn opinio provas ĝian ~econ B ; ofte potenco estas ~eco. ~e. Konforme al vero k justo : ~e punite laŭmerite Z ; nebolita akvo estas ĉiam danĝera, k des pli ~e dum epidemio. ~o. Ĉio, kio igas iun aŭ ion ~a : ju pli da havo, des pli da ~o Z ; la utileco de tia malbela konstruo estas ĝia ~o de ekzisto ; unu el la amikoj eĉ skribis ne sen~e, ke Z. ~1 (ntr). Esti ~a : kiu jam havas, tiu ~as Z. ~igi. 1 Deklari, montri iun ~a : kiu tro sin ~igas, tiu mem sin kulpigas Z ; nesciado de lego neniun ~igas Z ; tio ne ~igas nin enkonduki malregulecon Z ; mi nenion povas diri por mia ~igo. 2 Deklari, montri ion ~a : tio ~igas miajn esperojn ; projektoj proponitaj sub la laŭla, per nenio ~igita nomo de « lingvo tutmonda » Z ; tiu vidpunkto estas malfacile ~igebla ; per eraro ne ~igas la faro Z. Kp KONFIRMI. **Mal~a.** 1 Havanta opinion kontraŭan al vero k justo : la forestanto estas ĉiam mal~a Z. 2 Ne konforma al justo k vero, pp opinio : mal~a (senfundamenta) plendo (Vd KONDAMNI 3). **Mal~1** (ntr). Esti mal~a : kiu forton ne havas, ĉiam mal~as Z.*

**prebendo Z** (K). Rento alligita al eklezia titolo.

**precedenco Z.** Pasinta fakto, kiu pravigas analogan okazan fakton. Kp ANTAŬ-AJO 2.

\* **Precipe.** Adverbo, signifanta « antaŭ ĉio, ĉefe, pli ol ĉio aŭ ĉiu alia » : *sur tiuj ĉi kampoj pastas sin grandaj brutaroj, ~e aroj da bellanaj ŝafoj Z ; la kuraciston maltrankviligis ~e la febro B ; internacian lingvon bezonas ~e komercistoj k scienculoj B. ~a. Plej grava ; ĉefa : la ~a rolo, motivo ; la ~aj punktoj de parolado.*

**precipiti Z** (tr) ☞. Naski, per versado de unu solvaĵo en alian solvaĵon, nesolveblan komponaĵon, kiu pro sia pezo amasiĝas funde.

\* **Preciza.** Klare k detale determinita : *~a ordono, esprimo, difino, indiko, sciigo, horo ; (f) ~a horloĝo, verkisto, instrumento ; ~e respondi al demando ; mal~a (Vd NEBULA, VATI) ordono, vorto. Kp AKURATA, ĜUSTA, NETA, EKZAKTA. ~eco. Klara, detala k severa difiniteco : ~eco de desegno, stilo, lego, kalkulo. ~igi. Igi ion ~a : ~igi la signifon de vorto, la datojn.*

\* **Prediki** (tr). Konigi al publiko religiajn verojn : *~i evangelion, Jezu-Kriston ; Esp-ismo ~us amon Z ; ~i (rekomendi) akvon k trinki brandon ; ~i mensogojn Z, malverajn viziojn Z ; (f) ~i al surduloj Z (ne esti aŭskultata nek obeata). ~o. Parolado pri religia temo : *edifa, profeta ~o Z ; (f) fari al iu ~on pri moroj Z* (severe riproĉi. Vd KAPO, LAVO, TANI).*

\* **Predikato** (G). Adjektivo aŭ substantivo esprimanta kvaliton, kiun oni atribuas per helpo de verbo al subjekto aŭ al objekta komplemento. En la frazoj « la tago estas bela », « mi fariĝis kapitano », « vi ŝajnas malgaja », la vortoj « bela, kapitano, malgaja » estas la ~oj de la subjektoj « tago, mi, vi ». En la frazoj « ne nomu min reĝido », « oni ne povas konsideri neekzistantaj tiujn faktojn », la vortoj « reĝido, neekzistantaj » estas la ~oj de la objekta komplementoj « min, faktojn ». Kp EPITETO.

**Prefekto.** Regna funkciulo, administranta pli malpli grandan distrikton. Kp GUBERNISTRO.

\* **Preferi** (tr). Pliami, pliŝati, plivoli : *~i morti ol senhonorigi ; ~i supon ol viandon, poezion ol prozon ; tion mi ~as al la manĝoj el kuirejoj de la plej bona hotelo Z ; el du malbonoj mi ~as la pli malgrandan ; la viroj ~as la blondulinojn ; mi ~us, se vi mem alportus al mi la libron ;*